

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 7

Bengaluru FC coach mapa abentsü
atema Zaragoza shimogo

Rara indang nükjidong
memelensi: Vladimir Putin

VOL. XXI NO. 68 (ADOK 68) DIMAPUR ROGONÜ (FRIDAY)

LUCHII (DECEMBER) 15, 2023

₹ 5.00

CSS kübok All Nagaland ANM ajanga itasen meshir

Dimapur, Luchii/December 14 (TYO): Centrally Sponsored Schemes kübok Department of Health & Family Welfare, Nagaland nung inyakba All Nagaland ANM (Auxiliary Nurse and Midwife) ajanga parnok nem ita asem tashi itasen magütsüba khuret lemsatepa liasü.

Association ajanga ashiba agi, parnok züngsem Mokokchung, Kohima, Phek, Longleng, Tuensang, Tseminyu, Wokha, aser Mon district tem nung inyaker ita asem September

nungi November 2023 tashi indang itasen mangur aser Kiphire aser Zunheboto nung inyaker November itasen mangur.

Iba atema Department dang aiben mepishiaka tang tashi telangzüba kecha mali ta ashir.

Department dang tekeraba nung itasen agütsütsü Association-i ajungshi aser ashiba ama itasen magütsüra democratic yimya nung itasen mangu tashi longkak aittsu renema lir, ta All Nagaland ANM ajangasa ashi.

Nisung ka küm 20 tepuokdak ayutsü obendang agütsü

Kohima, Luchii/December 14 (TYO): Principal District & Sessions Judge & Special Judge POCO Act, Kohima, Duvelu Vero NJS ajanga Chita Debarman küm 20 tepuokdak ayutsü (rigorous imprisonment) obendang agütsü aser senchi sen 5000 achi.

Iba senchi ya menonoktetra, ken o nung aija alisang simple imprisonment ano ita asem tepuokdak alitsü, ta December 12, 2023 nü obendang agütsüba nung shia liasü.

Phezoucha (New Secretariat, Kohima) colony nung arishi küm 12 majung tetsür ka dak tim

ANCSU-i state sorkar dang PM Scholarship meshir

Kohima, Luchii/December 14 (TYO): All Nagaland College Students' Union (ANSCU) ajanga state sorkar dang tezüluba ka nung Nagaland nung aliba ST kaketshir asoshi 2022-23 atema Centrally Sponsored Scheme - Post Matric Scholarship

tanabuba instalment December 22, 2023 tashinung agüjang, ta takhangba agütsügo.

Iba anogo tashinung scholarship magüütetra onoki democratic yimya nung tapet mera agia longkak aittsu, ta ANCSU ajanga ashi.

Manipur nung nisung tasümany kar district balalai bener ogo

Imphal, Luchii/December 14 (Agencies): Manipur nung May 3 nü kin balala tsünta azüdkshi tenzükba sülen tepsetba nisung tasümany 73 pei aliba district tem bushia Brehostibarnü bener ogo, ta kettangsürtemi ashi.

Supreme Court ajanga Manipur sorkar dang item tasümany anepalua aremtsü totuyuba agütsüba sülen iba mera ya agia liasü.

Tasümany ya Imphal aser Churachandpur nung aliba moziüki balala nung ita aika yua liasü aser karbo May 3 nü nungi yua liasü.

Brehostibarnü Air Force helicopter temi Meiti nunger timba aliba Imphal district nungi nisung tasümany 41 Kuki-Zomi nunger timba aliba Churachandpur-i bener ao.

Ano Imphal nungi tasümany 28 Kangpokpi-i bener ao, kong Kuki-Zomi nunger timba alir.

Churachandpur district hospital nungi tasümany pezü Imphal-i bener aru.

Asür kinungertem dang tasümany agizüksü asoshi hopta ka agüjang aser iba sülen tasümany ya sorkari aremtsü ta nüburtem nem metedkang, ta November 28 nü Supreme Court ajanga Manipur sorkar nem totuyuba agüja liasü.

Committee on Tribal Unity ajanga district nung Hokulbarnep 5:00 ako nungi nikongdang 5:00 ako tashi mokdang ayongzüko.

Churachandpur nunga iba ama 'mass burial' ya alitsü saka anogo melemtet, ta lokti tentet temi ashi.

Tanur ka takum yangertsü arok shilem lir: Advisor Dr. Yhome



Advisor, School Education & SCERT, Nagaland, Dr. Kekhriehouli Yhome-i December 14, 2023 nü Dr. Neilhouzhii Kire GHSS Seikhazou küm 75 ajungba nüngtem nung adokba souvenir sayatsüdang tangokba noksa nung angur.

Kohima, Luchii/December 14 (TYO): Dr. Neilhouzhii Kire Government Higher Secondary School, Seikhazou küm 75 ajungba (1948-2023) nüngtem nung sentong tajung ka D. Khel Indoor Stadium, Kohima village nung "Pledge for fulfilment" omen nung ajemdaker December 14, 2023 nü agia liasü.

Iba school lapoker küm 75 ajungba nüngtem nung Advisor, School Education & SCERT, Nagaland, Dr. Kekhriehouli Yhome-i class takdang ana semzüksü, koba Performance Incentive Grant- NECTAR-Lighthouse aser community mobilization ajanga yanglu liasü.

Iba sentong nung tesemdanger tongti ka ama jembidang Dr. Yhome-i state nung education sector aintsu atema nüburtem dang teyari meshia liasü.

"Tanur ka lenla balala nung takok anguba nisung ka akumtsü asoshi tesayur mesüra tsürabor kisüng masü saka nübur ajunga teinyaktsü aser shilem lir," ta pai ashi.

Yimtsüng ajunga nung amai tekülem ki ya tuluba lir, anungji arogo temi school indang ki ojen nung temulung agütsünung ajungtsü, ta pa ashi.

Nagaland ama state tila ya tetokteba lima nung takok angutsü meranga inyaker,

asenoki meranga inyaker aser takok angutsü asoshi shisaliok ajanga dang asenok anitsü," ta pai ashi.

"Tesayur ka akumtsü asoshi tesayur training agütsü nüngdaker. Tanü asen den tesayur tajungtibatem lir. Sorkar meyong kaket reju tem nung aliba tesayur ajanga tajung dang lir," ta Advisor, School Education & SCERT, Dr. Yhome-i ashi.

Iba sentong nung taoba minister Dr. Neikiesalie (Nicky) Kire-i o tatsüka jembidang 2017 küm iba school tenüng Dr. Neilhouzhii Kire GHSS melentsüba asoshi pelaba lemsatepa liasü.

Pai Advisor Dr. Yhome dang iba school nung science stream amenoktsü asoshi mapa inyaktsü ajungshia liasü.

Iba school lapoker küm 75 ajungba asoshi tenüng sang agüja jembidang, "Asenok tejakleni mera oti aser tayongzükba balala asenoki ajangti," ta Rtd. headmistress K. Mary-i ashi.

Iba sentong nung Dr. Neilhouzhii Kire GHSS Choir aser school tesayur temi temeja ken ka-ka aten aser Ketuonei Kire-i melepzung o jembia liasü aser lokti chiyonga iba jubilee tembang.

Dr. Neilhouzhii Kire GHSS indang vice principal, Rose Chishi-i ashiba agi, nüburtem

nem shisaliok agütsütsü mechii yangi aliba lenirtemi lungjemer iba school ya 1948 küm private lower primary school ka ama amenoka liasü.

Sorkari 1956 küm recognize súa Government Middle English School upgrade asü aser 1982 küm Government High School akum. Maneni sorkari iba school ya Arts aser Commerce streams keter 2010 küm Government Higher Secondary School kumtsü aser 2014 küm activate asü.

Daphfutsumia Khel, Kohima village nungi Dr. Neilhouzhii Kire, shiba Naga nunger rongnung first matriculate (1918) aser medical doctor (1922) liasü, pai dangar dak alia takok anguba nüngtem nung state sorkari August 10, 2017 nung school tenüng ya Dr. Neilhouzhii Kire Government Higher Secondary School jatsü, ta lai ashi.

Tang aliba school kimong ya Lt. Diechulie Haralu, Lt. Lhousielie Yiese, Lt. M. Zeluotuo Sachu aser Lt. Lhouzhiale Sorhie nungeri tenlabia lir.

"Nüburtem shisaliok asoshi parnoki ali kimong agütsüba atema parnok dang school-i kanga pelar," ta Chishi-isa ashi.

Tang Dr. Neilhouzhii Kire Government Higher Secondary School nung class 6 nungi 12 nung kaketshir 635 lir.

Geospatial Applications atema User Interaction Meet ali

Dimapur, Luchii/December 14 (TYO): Nagaland GIS & Remote Sensing Centre (NGISRSC) aser North Eastern Space Application Centre (NESAC), Department of Space, Government of India lungjemer December 14, 2023 nü User Interaction Session ka ayongzüka liasü.

Iba sentong nung geospatial application indang Plan of Action nung sensaksema ali aser North East Spatial Data Repository (NeSDR) indang mapa agi kanga junga inyaka sayu.

Iba sentong ya NGISRSC nung aliba Training and Capacity Building Hub nung agia liasü.

Iba sentong nung Principal Secretary aser Development

Commissioner, Government of Nagaland, R. Ramakrishnan IAS aden aser pai Nagaland GIS ajanga maparen balala inyakba tushia liasü.

Ramakrishnan-i iba sentong nung shilemagiba line department tem dang nüburtem ajangzüksü mechii geospatial applications ajanga maongka balala agütsüba amshitsü ajungshia liasü.

North Eastern Space Application Centre (NESAC) nung Head of Geoinformatics and IT (GID), Dr. Dibyajyoti Chutia ajanga iba sentong nung Emerging Technologies indang presentation ka agüja liasü.

Iba sentong nung pai Governance application nung

North East Spatial Data Repository (NeSDR) amshiba live demonstration sayua liasü.

NGISRSC nung Deputy Project Director, Merenwapang-i Nagaland indang geospatial Plan of Action indang tejangja lemsatepa liasü.

Technical session nung pai anir plan components indang jembia liasü aser sentong nung adener temia shilem agia shisa lemsatepa liasü.

NGISRSC nung Project Director, Er. M. Kithan-i tarur pela agizükbä den külemi iba senden indang nükjidong lemsatepa liasü.

Iba sentong nung line department 15 nungi ketdangsürtemi shilem agia liasü.

Input Distribution program nung Mhathung-i shilem agi



Dimapur, Luchii/December 14 (TYO): CAU Regional Agri Fair 2023-24 Input Distribution program December 14 nü Expositional Hall, State Agri Expo, 4th Mile, Chumoukedima nung agiogo. Iba sentong nung Advisor, Agriculture, Mhathung Yanthan alakteta jaoker liasü.

Sentong nung o jembiba mapang alakteta jaokeri, tzü mopung melenshiba ajanga aluyimba dak koda konshir iba indang lemsatep. Pai, item tetsüdkaktsütem ya ajangteta otettsü atema b u s h i s ü n g d a n g e r t e m , aluyimertem, scientist tem, academic tem aser govt. agency tem ajak longjemer inyaktsüla, kechiyong tzü mopung melenshia aoba ajanga tetsüdkaktsü balala adokdaktsübatem den raratsü atema tasa asatsü asoshi ajak longjemer inyaktsüla, ta ashi.

Paisa, North East kong tekonglu timba ayimer, iba

aluyimba yimya ya joko kangabo tapet masü kümogo, anungji asenoki aluyimba yimya tasen ka, tsünüsenpongtsü tsünüba yimya balaka aser tzü-mopung den apet tsünüsenpongtsütem tsünütsü atema tanga lenmang ka bushitsü nüngdaker ta ashi.

Item inyakyimtem ajak ya bushisüngdang lokti tentet, academic Institute, university aser College tem den longjemer inyaktsüla, ta pai shisem. Maneni Advisor-i ashiba agi, shisatsü, osang aser tajangshibatem lemsateptsü atema ken o dak sendaka aliba ATMA, Agri & Allied Sector department temi longjemer inyaktsüla aser koba inkyim ka benoka inyak nung tzü-mopung melenshiba ajanga tetsüdkaktsütem adodaktsüba bentettsü akoktsü aji asadangtsü nüngdaker.

Tatem nung pai, anogo asem tashi Agri Fair show kanga takok ngua ayongzükba atema sentong

ayongertem dang kanga pelaba lemsatep aser parnok dang taruba küm North East Agri Expo atema renema alitsü metedaktsü.

Input Distribution by dignitaries-i ashiba agi, NE state 7 prongla nungi aluyimertem telok 27 küma lemsar lir aser item teloktem nungi aluyimer telok 20 Agricultural & Horticultural Technological inputs ajanga ajangzüksü aser telok 7 Animal & Husbandry inputs ajanga ajangzüksü.

Taküm NE state ajak nungi aluyimer telok 27 nung aluyimer 800-900 densema liasü aser input category 27 aluyimertem nem lema agütsütsü.

Iba sentong nung Director of Research, CAU, Imphal, Dr. LM Garnayak-i lokti pela agizükba o jembi aser DEE, CAU, Imphal aser organizing Secretary, Prof. PH. Ranjit Sharma-i tepela anküp o jembia liasü.

Mission Shakti-i PMMVY indang metedaktsü

Dimapur, Luchii/December 14 (TYO): Additional Secretary Mission Shakti, Social Welfare department-i sangdong ka ajanga PMMVY atema State Level Special Registration Drive (PanjikaranAbhiyaan) dak sendakba nung osang ka agütsüogo. PMMVY ya centre-i sponsor asüba Mission Shakti kübok conditional Maternity Benefit Scheme ka lir.

Iba scheme ajanga mashisa aliba tetsürtem aser mama yongdakja aliba tetsütem nem mezüngbuba tanur asodang sen 5000 aser tanabuba tanur ya tetsür sora sen 6000, Direct Benefit Transfer (DBT) ajanga agütsür, koba tanur sor ita teku tsüngda agitetsü.

Temetettsü kaju 01.04.2022 nü mesüra iba sülen tanur tanabuba asoba (tetsür tanur) tetsütem PMMVY scheme atema züngoksemtsü asoshi temsüa lir, koba 31.12.2023 tashi asütsü.

Pradhan Mantri Matru

Vandana Yojana (PMMVY) ya India sorkar indang conditional Maternity Benefit Program ka lir, koba Ministry of Women and Child Development-i Anganwadi services amshia benoka inyaksangshir.

Schedule Castes aser Scheduled Tribe tetsürtem, tetsürtem shirnok tera (40%) mesüra lemtar lir, BPL/National Food Security Act 2013 Ration Card bina alirtem, Ayushman Bharat kübok PMJAY kübok tetsür beneficiaries tem, E-shram Card bina aliba tetsürtem, aluyimer tetsür shirnok Kisan Samman Nidhi kübok beneficiaries tem lir, MNREGA Card job Card bina aliba tetsürtem, tetsürtem shir kibongi küm nung sen lakh 8 dak tekübokba aazüker, mashisa aliba aser mama yongdakja aliba AWW/AWH/ASHA tem aser centre sorkari temelaba agütsür aliba tanga category tem küboki aitertem, PMMVY scheme agitsü atema temsüa lir.

CATC nung NCC Group Commander-i Cadets tem ayongzük



Dimapur, Luchii/December 13 (TYO): Greenwood School, Dimapur nung 1 Nagaland Girls Battalion NCC, Kohima ajanga ayongzükba Combined Annual Training Camp (CATC-102) sentong December 11, 2023 nü tenzükogo.

December 12, 2023 anepdang training tenzük Drill aser Physical Training agia liasü aser iba sülen Camp Commandant, Col Manjeet Katoch-i ANOs/CTOs aser cadets tem pelashishia agizük aser training nung tajungtiba nung shilem agütsü ayongzükba liasü.

Iba training nung lenla balala nungi o jembitsü aliba, saisapong balala nung tokteptsü aliba aser sentong balala tarense lemsatepa liasü.

Officiating Group Commander of NCC Group HQ, Kohima, Col Shehzada Kohli-i iba camp semdanga staff aser cadets tem den sensaksema liasü.

Iba sülen ANO Vinatoli Francisca-i 'National Integration and Nation-building' onük nungi jembi aser iba sülen Range Drill Procedure nung lecture cum demo aser kijai ken atenba tetoktepbä agia liasü.

CRPF-i computer, printer aser UPS tenla agütsü

Dimapur, Luchii/December 14 (TYO): Kigwema yimtsüng nung aliba lanurtem computer training ajanga human resources terenlok kadaktsütsü nükjidong nung 78 Bn, CRPF, Zubza-i, desktop computer, digital printer aser UPS tenla agütsüogo.

Yimtsüng nung aliba lanurtem nem computer training aser education agütsütsü atema Kigwema Students Union-i computer aser digital printer agütsütsü mepeshiba ama 78 Bn-i parnok indang CAP sentong ajanga item tenügdakba osettem agütsüogo.

Computer aser digital printer tem ya December 14 nü Panchayat Hall Kigwema nung Civic Action Programme ka ayongzükba agiba mapang lemsatepa liasü.

Mupongchuket yimta tanu mezüngbuba Ongjinaro Benjungmung lapoktsü aser Alakteta Jaoker Mokokchung Chamber of Commerce & Industry(MCCI) President Wb.Tsükti Longkumer Putu yimsüsur aser MCTS pur külemi tangokba noksa.



Mupongchuket yimta tanu mezüngbuba Ongjinaro Benjungmung lapoktsü aser Alakteta Jaoker Mokokchung Chamber of Commerce & Industry(MCCI) President Wb.Tsükti Longkumer Putu yimsüsur aser MCTS pur külemi tangokba noksa.

Mokokchung, December/ Luchii 14(TYO): Mupongchuket yimta tanu mezüngbuba Ongjinaro Benjungmung (Ongjinaro Festival) Mupongchuket Community Tourism Society-i(MCTS) Süngkotenem Park nung ayongzükä kadagi.

Tanu iba mezüngbuba Ongjinaro Benjungmung lapoktsü aser Alakteta Jaoker Mokokchung Chamber of Commerce & Industry(MCCI) President Wb.Tsükti Longkumer jembidang tanu putu alima nung Industry rongnung tekaratiba ainbaji Tourism Industry ya lir, anungji asen nübertem iba temoatsüji agütsü asoshi temelung aguja inyaktsülatu ayongzükä ashi.

Naga lima nung tourism inloka aotsü lenmang kanga dang sadema lir, saka telungpur timtem aliba ajanga lima penzürtem asen limai marur, aser ibaji ajanga asen Naga lima nung tourism meinlokerta Tsükti Longkumerisa ashi.

Mupongchuket yimji lima penzürtem puatsüa tesem aika

lir, iba den Moatsü, Tsüngremmung, Christmas, Süngkotenem Festival aser ano Ongjinaro Festival itemji amunger, anungji item benjungtemji ajanga ner Mupongchuket nung tourism ajungketa inyaka lima penzartem sadok sadoka lia anisüngzükä anenzüker parnok anepalutsü Mupongchuket nunger tourism mapatong asoshi renema alitsü nungtakerta President Wb.Tsükti Longkumerisa adenshia aliba Mupongchuket nungertem ayongzükä jembi.

Tsükti Longkumerisa tourism nung original nungtaker, lima penzürtemi asen limai arudang kisü jensü, takpi takra aser inyaksangshi kechisarena ajak original reprangnua parnok asen limai arur, anungji parnok tanu aruagi mongzüker or kelana tanaben arunütsüa asenoki tourism tsütsülen tapu ajak original-ji renemtsülatu ashi.

Kasa sentong nung Mupongchuket Community Tourism Society convenor Wb.Limalenden Longkumeri tarur pela agizükba den

Ongjinaro Benjungmung ayongzükä amungba indang metedaktsü. Iba den Mupongchuket Putu menden ajanga salem o jembiba den Moatsüng Longkumeri ken tajung ka dena sentong tobur jungdaktsü aser sentong nung Tsüngrem lenisüba jazüka Mupongchuket Baptist Arogo Secretary Temjen ajanga sarasademer tenzük aser tatem nung sentong Tsüngrem lenisüba adenba asoshi tenüngsang agüja Mupongchuket Baptist Arogo Youth Pastor Süngjemrenbai sarasadema den

Mupongchuket Ait Laishir Telongjem President Katilong Jamir ketdangsüba nung iba sentong agia liasü.

Ongjinaro Benjungmung ya anogo ananü benjung asütsü iba benjung akaba mapang aonung kentenba sentong alitsü aser teka mapa balala agi inyaktetba aser chiyungtsü tapu balala yangluba yokdag. December 15 anogo tanunu anepdang 10:Ako nung tenzüktsü aser aonung 8:Ako nung shipangtsü sentongtem renema lir.

Second-In-Command, 78 Bn, CRPF Sh. R.V. Philip-i, Sh. J. P. Singh, Dy.Comdt, Officers, 78 Bn sepaitem, Kigwema yimtsüng Chairman aser kaketshir lokti tentet tir aser züngsemtem matsüngdang Kigwema yimtsüng nem agüja liasü.

Kigwema Students Union tir Mezhuvi Thorie-i ashiba agi, computer den Digital Printer ya jenjang ajak nung kaketshir tem education aser bushisüngdang asoshi kanga tajangzük asütsü aser iba ya Kigwema nung aliba kaketshir tem atema alizüng tasen ka asütsü.

Kasa mapang nung village chairman, Balie Kere-ia, Kigwema yimtsüng nem teyari tulu agütsüba atema 78 Bn. CRPF dang kanga pelaba lemsatepa liasü.



December 14, 2023 nü New Delhi nung Delhi Lt. Governor VK Saxena, Chief Minister Arvind Kejriwal aser Transport Minister, Kailash Gahlot nunger electric bus 500 tenzüksüdang tangokba noksa nung angur.

Paliament nung security raksaba atema sepa 8 mapa nungi anentsüogo

New Delhi, December 14 den senden ka ayongzüka (Agencies): Bodhbarnü

Parliament nung security raksaba tatalokba dak sendakba nung Brihostibarnü Lok Sabha secretariat-i sepa 8 mapa nungi anentsüogo.

Sepaitemji Rampal, Arvind, Vir Das, Ganesh, Anil, Pradeep, Vmitt aser Narendra nunger lir.

Lok Sabha nung Zero Hour mapang nung Sagar Sharma aser Manoranjan D na public gallery nungi Lok Sabha chamber telungi aita yimyim ayim aser pongdang nungi mokozi chioka liasü, ajisüaka MP temi tenaprong azüokteta liasü.

Parliament nung security tashimaibta dak sendakba nung Brihostibarnü Ato kilonser Narendra Modi-i minister tem

Minister Amit Shah-i telangzüba agütsüla, kechiyong Delhi Police aser security agency ajaki pa nem item report agütsür. Iba khuret nungjagi pai jena maotsüla. BJP MP, Simha-i aibelenertem nemji telungi aittü temelaba agüja liasü. Iba nung ya asalentong tulu keta lir, anungji pa nem temerenshi magütsübo metokstsüla," ta ashi.

Bodhbarnü iba tatalokba sülen Brihostibarnübo Parliament aser telunget ajak nung security akhangshia liasü aser Parliament telungi air ajak jungjunga mita reprang.

Yashi tatalokba dak sendakba nung nisung pezü pua parnok anema Unlawful Activities Prevention Act (UAPA) ken o benokogo.

Congress MP Manickam Tagore-i, "Iba ya intelligence tamakok lir, anungji iba tatalokba ya jungjunga bushisüngdangtsüla. Home

69 nung ang takok angu.

Mongolbarnü BJP legislature party senden nung tang mezüng MLA, Sharma chief minister shima liasü. Iba senden nungji party central observers- Rajnath Singh, Saroj Pandey aser Vinod Tawde nungera liasü.

Kasa senden nungji Vidhyadhar Nagar MLA, Diya Kumari aser Dudu MLA, Bairwa na deputy chief ministers shim aser Ajmer North MLA, Vasudev Devnani Speaker shima liasü.

Tanü Bhajan Lal Sharma-i Rajasthan Chief Minister tenangzükba agitsü

Jaipur, December 14 (Agencies): Hokolbarnü Jaipur nung Bhajan Lal Sharma-i Rajasthan Chief Minister tem

tenangzükba agitsü aser iba sentong nungji Ato kilonser Narendra Modi, Union Home Minister Amit Shah aser BJP National Tir J P Nadda densema party lenirtem aika adentsü.

Tenangzükba agiba sentongji Albert Hall nung agitsü.

Bharatiya Janata Party (BJP) otongdar kati, iba sentong

69 nung ang takok angu.

Mongolbarnü BJP legislature party senden nung tang mezüng MLA, Sharma chief minister shima liasü. Iba senden nungji party central observers- Rajnath Singh, Saroj Pandey aser Vinod Tawde nungera liasü.

Kasa senden nungji Vidhyadhar Nagar MLA, Diya Kumari aser Dudu MLA, Bairwa na deputy chief ministers shim aser Ajmer North MLA, Vasudev Devnani Speaker shima liasü.

Taküm ita ter tsüngda Maharashtra nung aluyimer 2,366 soseta süogo

Nagpur, December 14

(Agencies): Taküm Maharashtra nung January nungi October ita tashi nung aluyimer 2,366 soseta süogo, ta Brihostibarnü Minister for Relief & Rehabilitation, Anil Bhaidas Patil-i state assembly nung metedaktsü.

Aluyimertem teimba soseta asübaji Amravati revenue division nung liasü; iba division nung aluyimer 951 soseta asü, ta minister-i metedaktsü.

Assembly nung Congress MLA, Kunal Patil-i asüngdangba langzüdang minister-i, "Taküm January nungi October ita tashi nung aluyimer 2,366 soseta asüba osang Maharashtra sorkar nem metedaktsü," ta metedaktsü.

Amravati revenue division nung aluyimer 951 soseta asü, Chhatrapati Sambhajinagar division nung aluyimer 877, Nagpur division nung 257, Nashik division nung 254 aser Pune division nung aluyimer 27 soseta süogo, ta minister-i metedaktsü.

"State sorkari soseta asüba

aluyimertem kibongtem shia nem senotsü teyari sen lakh kaka agütsügo," ta paisa shisem.

Mongolbarnü (December 12) Maharashtra assembly nung opposition lenir, Vijay Wadettiwar-i, tzü-mopung lendong aser state sorkar tamakok ajanga state nung anogo shia aluyimer tenetbosa soseta asür, ta metedakja liasü.

Assembly nung aluyimertem tebilemtsü onük atema o lemtedpang Vijay-i, BJP, Shiv Sena aser NCP (Ajit Pawar) sorkari mongpu masüdang tzünglu aruba ajanga alu nung takoksa angur aluyimertem nem tekaraba nung teyari agütsütsü mesangdong, ta aitsü.

Paisa, "India nung aluyimertem soseta asüba shilem 37 bo Maharashtra kija nung lir, ajisüaka iba sorkar dak taaktsü maket. State nung July 1, 2022 nungi July 1, 2023 tsüngda alu nung takoksa anguba aser sentsüh ajanga aluyimer 3,000 soseta süogo, ajisüaka iba sorkari iba onük ya süoki ia magir," ta aija liasü.



December 14, 2023 nü Bhopal nung Madhya Pradesh Angh, Mangubhai Patel aser Chief Minister Mohan Yadav nati State Assembly nung Pro-tem Speaker tasenba, Gopal Bhargava nem tetushi agütsüdang tangokba noksa nung angur.

Lok Sabha nungi MP 14 aser Rajya Sabha nungi MP ka anentsüogo

New Delhi, December 14 (Agencies): Bodhbarnü Parliament nung

security raksaba anema Brihostibarnü Parliament House anaprongla nung rongrong tulu adokba ajanga Lok Sabha Speaker-i opposition MP 14 anentsü aser Rajya Sabha nung Chairman, Jagdeep Dhankhar-i TMC MP, Derek O'Brien anentsüogo.

Lok Sabha nung Speaker-i anentsüba opposition MP temji DMK MP Kanimozhi Karunanidhi, Congress MP Karti Chidambaram, Benny Behanan, VK Sreekandan, Mohammad Jawed, PR Natarajan, K Subrahmanyam, SR Parthiban, S Venkatesan aser Manickam Tagore nunger lir.

Parliament kima osangbenertem den jembidang DMK MP, Kanimozhi Karunanidhi-i, "Item nisung (Parliament nung security tsütsü timtem agütsürtem) telungi aittü atema temelaba agütsür MP ka lir, ajisüaka iba MP ji anema kecha meinyaker. Pa onok den Parliament telung nung liasü. Onoki pa anema

longkak ait aser Ato kilonser o Home Minister na dang sendeni arua sangdong ka agütsütsü akhanger. Onoki iba tatalokba anema longkak aitba mapang nung parnoki opposition MP ajak anentsü. Mezung pongu anentsü, iba sülen teku anentsü. Sura iba ya democracy asü?" ta asüngdang.

Congress MP, Karti Chidambaram-i, "Yashi atalokba

tu security aser intelligence tamakok liasü. Onoki sorkar sendeni arua yashi atalokba indang metedaktsüner aser iba atemaji parnoki kechi telemeteba agiar metedaktsüner. Sorkari tekong meranger aser Ato kilonser o Home Minister natia sangdong magütsür. Onoki item takhangba agüja longkak aitba ajanga onok ola nembangtsütsü atema MP 15 senden piyong atema anentsüogo," ta metedaktsü.

Bodhbarnü Lok Sabha nung security raksaa nisung ana senden telungi aiter mokozi chiokba tatalokba dak sendakba nung opposition MP temi Ato kilonser mesüra Home Minister dang nungi telangzüba meshir.



December 14, 2023 nü New Delhi nung Congress Tir aser Rajya Sabha nung Opposition Lenir, Mallikarjun Kharge leniba nung opposition lenirtem senden amendang tangokba noksa nung angur.



TIR YIMYIM

YIMOBILEM (EDITORIAL)

DIMAPUR ROGONÜ, DECEMBER (LUCHII) 15, 2023

Mitkari anir chia ajemer na ?

Nagaland nung yi jemner dang masü saka mozümora chinürtema aika lir aser item rongnung, taoksatsüka aser shisabolutsüka, Nagaland police-tem aika dena lir. Aji oda, nübortem anepalutsü shimba ketdangsertemi pei asoshi dang bilemer aser nübortem timtem lendong nungi kümzüka anüksü atema shimba mitkartemi yi ajemer, mozümora achir aser ozüngi memelaba achi-ajemtsütem shibeleren ta süra iba limajibo tatembang ka dangi arur asütsü. Tanü iba limaji asen lima lir. Atangji, tang temulung alemtsü tilaka alibaji Nagaland police nung tulubai anir Nagaland nung mozümora shibelenba aser achajemba mapatem anema kanga sashia mit tenzükogo. Ibayongji küm ka tsüngda ozüngi memelaba mozümora ganja seret 1171, Kaini seret 32, Heroin seret 26, Brown sugar seret 5 aser Yaba süngjang 21027 den tanga mozümora süngjangtem meyirijang aika tesem balala nungi apuba osang lir. Item mozümoratem ayokba aser achiba dak aketba maparen nung taküm küm kija nung Nagaland police-i nisung 456 puogo aser okadak ken o 318 agüja lir. Itemji kecha khuret mabenba nübortem kija masü saka mitkartema 49 tashi densema lir aser item mitkartem rongnung mitkar tibo mapa nungi anentsüogo aser mitkartemji dang masü, ano state government mapa nung inyakertema nisung asem dena lir. Nagaland nung mozümora achiba dang masü saka ayokba tebilemtsü ya tanü tasen masü saka ibai taoba alima aso 20 buba nunga liasü. Ajisüaka, Nagaland police-temi tang temulung agüja inyakba amaibo inyakba mangu. Iba lagi achajem mazüoktetba ajanga junga mezüngtetba purtem aika police aküm aser item lagi ozüngi memela mapatem azüoktsü melen parnokjiang ozüngi memelaba mapa inyaker aküm. Ibai parnok tai masü saka parnok shimokertemji tai lir. Kechiba linük ka tsükchirtem ket nungi kümzüka mittüs purtem shim dang, metendangi mashimashi shimer ? Item dangji sen yong mapaji ayok asü ? Mesüra election nung yariba agi mozümora achir asüyonga Nagaland mitkar asütsü shim ? Mesüra kinunger aser kidang küm aika alir asüba agi Nagaland midakstsüba shim ? Aji oda, Nagaland police asütsü atema yi jemer aser mozümora achirtem, asema moutet aser tekongra purtem, anidena shim amai shimbajii asen lima külakoktsüba mapa tamajungtem rongnung ka asütsü. Iba lagi tanü tashi Nagaland janar. Linük nung mitkartem ya tsükchir mitertem dang masü saka linük akhüm aser topur jungdaktsürem lir. Item mitkartem lagi Nagaland süngüm anükdang süisüponger garitem dang kecha sarua magii parnok timtem dang repranga yariba ajanga pei lima akhüm kettstsü. Kasaji, yimti nung traffic police-tema süoshi shitak jungjunga sübor garitem tipdema senzüdakja anepaluba agi yimtiji topur jungdaktsür. Ajisüaka, ano külen yimti tezü külen kilentzü nung police süoshi agir kechi agi mesepar memetet ondaka ngura, iba lagi pei lima agi peisasa nümmamedantetsüa ludaktsür. Kasaji, Nagaland gate ajanga gari süi majung Nagaland mitkartem anir sen meshira, iba lagi Naga nunger ajak ayoker ta metetdi. Nagaland nungbo mitkartem ya nübortem yarirtem asütsü. Aji oda, timtem lendong nung nübortem mitkartem dakjenoktettsüa mitkartem taküm yimya aser libaliro ajak peisasa pei azüokteta aliba taküm kaka asütsü tim. Iba teimla aser nükjidongji tang nungi danga Police-temi anir tenzükba yagi atakloksü imlar. Alima ajungtsüba ya tasakbo masü, tuleremi government mapa inyakdak nübortem meima indangindanga inyaktsü aser shisa tasen lemsateptsü; ano mitkartem pei talila ajangzüksü marishii pei lima nung nisung ajaki ozüng shitak benshia meraketa lidakstsüba atema, pei mapa nung ochishia aser temulung agüja inyaktsü ta süra alimaji tajungtsübas aser tajungleni arur ta bilemdi.

OLEMSABANG

PHED nung mapang tatsüda tsündä O&M staff 829 shim

-Odi Jamir, Longbok Lemtur & S. T. Yapang Lkr, Kohima.

PHED RTI reply NO.CE/PHE/RTI/2002/239 Dated Kohima, the 31st August 2023 nung ashiba agi PHED nung Operation & Maintenance staff (tamalenbo Work-charge ta jaa liasü), 01/11/2022 nungi 01/05/2023 tashi nung 829 Join asü (shimok), iba shimba ya Deputy Secretary to the Government of Nagaland PHED: Kohima ajanga Chief Engineer, Sanitation & WSSO PHED dangi ajanga yokba shiti No.PHE-1/ESTT/13/2022 Dated Kohima, the 19th Oct 2022 nung ajemdaker shim.

Police battalion shimba sülenbo Department ka nung mapang tatsüka tsüngda staff timtiba shimba rongnung ya ka asütsü. RTI reply NO.CE/PHE/RTI/2005/239 Dated Kohima, the 31 August 2023 nung ashiba agi "Administrative Approval No.PHE-1/ESTT/13/2022 Dated Kohima, the 19th Oct 2022 nung item post ya advertised sur shimtsü kecha shia mali, ajisüaka Departmental Screening committee-i dang achayangtsü shia lir", anungji tarutsü nungbo interview agirsa shimtsüsa tetuyuba agütsütsüla ta reprangteter.

Tang PHED nung yabo ITI nung Plumber training agir alirtem nem ya mangoka ka agütsütsüla mesüra mapa tazüng adokba nungi % ishika wazüka yutsütsü tim ta angateter.

'AOR ASÜRMETENLA' KAKET

- P. Alem Jamir, Dimapur

Asen lenir aser tsürabur tajung Wb. P. Renty Jamiri züluba 'Aor Asürmetenla' kaket nung ya lanuwa mapang tsüraburi ashiba tejen otsü aika zülua lir. Ibai ajak atema senti senmang kaket tajung ka lir.

Tangar kinbo komar memetet, saka asen Aorbo tar nunger otsü (Asürmetenla) ta alemlı taoba pututem nung atalokba tejen otsü aika jembir. Item otsütem ya shilua angazüksü tongtibang ta bilema liasü, aji saka tsürabur tajung aika sentirishi tembangatokogo. Aji oda süaka ano tanü asen lanu putui kanga moa asen tsürabur P. Renty Jamir ama temeteter nisung tajung aika lir, nenok Tsüngremer anogo matongdang lanuasensor asoshi takokertemibö iba ama mapa tajung inyaka yutsüra ajak asoshi temoatsü tulu asütsü.

Tangar lima nungbo kaket zürürtemji takar akümer aser jangratema alir, saka asen lima nungbo kaket zürürtemi aiben tangari memetetba timtem dang jenti ajurur. Kaket ka zülua adoktsü ya mapa tezübabö masü. Item tia balala ajakji arema asen tsüraburi tarutsü putu asoshi mesamaba senmang Aor Asürmetenla (otsü) kaket tajung zülua yutsüba asoshi ajaki tenüngsang agütsüdi.

KAKET TASEN KA

-Imlidangit Longkumer

P. Renty Jamiri züluba kaket AOR ASÜRMETENLA, Changtongya Town Baptist Argo pastor Rev. Temshi-i sarasadema sayatsüogo. Asen Aor asen oshi nung kaket zürür mongin takotet aika lir. Saka tang tashi yamala tejen otsü bendena züluba mangur. Kechiyong iba ya tezüller kolok nungi adokba masü, akhi tsüraburi jembia, tenshia aruba otsü aser kentem dang lir. Iba kaket züluba nükjidong ya Ph.D. agir, M.A., B.A. azüngertem thesis züldudang aiben nüngdaka tasüngdangi aruba agi zürür. Yangi Ao lima nung atalokba aser Aori jembia aruba tejen otsü 56 den yimdong kazür ken ishika zülua lir. Tazüngertemi Ao oshi aser Aor Sobaliba otsüla, oboula nunger lia aruba angazüksü nükla nung rangloker zülu. Ano Rabitsür otsü aika densema alinung Aotsür tetsür sentep tesayulatem (APW) asoshia teyari angutsü ta imlar. Asenoki phone yimleni or kaket mezüngür anungji ASÜRMETENLA ajak tatsütiba nung züluba lir. Iba kaket Dimapur, Mokokchung, Changtongya nung angutsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünge ri angateta agitsü mepishir

Vietnam nung Evangelistic sentong agiba agi nisung aika kongshiogo



Taküm March ita nung Franklin Graham-i Vietnam kubok Ho Chi Minh yimti nung 'Spring Love Festival' evangelistic sentong agidang tangokba noksa nung angur.

December 14, 2023: Tawa pastor kati, taküm küm tetenzüklen sayutsüngir Franklin Graham-i ayongzüka agiba Evangelistic sentong ajanga Yisu Khrista memeteter Vietnam nunger aika kongshiogo, ta ashi.

Mission Network News den jembidang Pastor Luke-i, "Iba ya Argo aser kettangsertem tsüngda tesendaktep dak keta lir. Parnok tsüngda tesendaktep junga lira Khristantem mission mapa inyaktsü asoshi kettangsertemi kishi terabo lapoktsütsü," ta metedaktsü.

Taküm March ita nung Franklin Graham-i Ho Chi Minh yimti nung 'Spring Love Festival' ta ser evangelistic sentong ka ayongzüka agia liasü. Vietnam sorkari tamalenbo evangelistic sentongtem Easter mesüra Khristmas mapang nung ang agitsü temelaba agüja liasü.

Evangelistic sentong nungji nisung 42,000 dak tema aden aser Graham-i jembiba oji Pastor Luke-i par oshi nung meyipzükli liasü.

Pastor Luke-i, "Evangelistic sentong anogo ananü agiba mapang nung nisung 4,500-i pei taküm nung Yisu Khristoji Kibur aser Kümtetdakba, ta agizüka liasü," ta metedaktsü.

"Onoki tamanger tasenpurtemji local Arogotem

den sendakteptsüba sülen 'follow up' sentong agi. Yisu Khrista agizüker shilem 92-i Tenla kidangi aru aser onoki Laishiba nungi tesayuba agütsü. Iba ya evangelistic sentong ajanga atangba süngjang lir," ta pai metedaktsü.

Iba ya tang mezung Vietnam nung communist sorkari evangelistic sentong agitsü atema bendanger Khristan ka nem temelaba agütsüba liasü.

"Spring Love Festival ya puti otsüsütsüsa lir, kechiyong tang mezung yimsü dak sendakba sodi masüba anogo nung evangelistic sentong agitsü atema sorkari bendanger sayutsüngir ka nem temelaba agütsü," ta Billy Graham Evangelistic Association-i metedaktsü.

2024 küm nunga Vietnam nung evangelistic sentong ka agitsü tebilemba lir, aser iba dak sendakba nung Franklin Graham-i, "Tang agi tanabenbuba Vietnam-i arua sayutsüngitsü atema kü dang melaba asoshi ni Deputy Prime Minister aser sorkar dang pelar.

Ni Vietnam nunger den Tsüngrem temeim osang lemsateptsü," ta metedaktsü.

March ita tetenzüklen Franklin Graham Vietnam tonga aoba mapang Vietnam Deputy Prime Minister, Le Minh Khai

asher Ministry of Foreign Affairs, Ministry of Home Affairs aser Government Committee for Religious Affairs nungi tongti kettangsertemi pa agizüka liasü.

BGEA-i Vietnam nung Argo 300 den ayongteper Spring Love Festival ya ayongzük.

Anogo ananü sentong nungsa Michael W. Smith, Luu Chi Vy, Isaac Thai, Le Nguyet Anh aser Naomi Nguyen nungeri ken ajanga shilem agia liasü.

Arrshi küm 70, Franklin Graham-isa Vietnam nung kettangsertem den senden aika amendang linük nung yimsü balala amanger aika aliba aser sorkari religious freedom pusemba dak sendakba onüktem nung o lemtepa liasü.

2023 küm Open Doors US World Watch List nung alima nung Khristantem alitsü linük tamajungtiba 50 rongnung Vietnam ya jenjang 25buba nung lir.

Tang alima nung communist sorkar ishika dang lir aser Vietnam nunga tesüiba küm aika sorkari yimsü dak sendakba ozüngtem benoker aser register süa aliba yimsü dak sendakba organizations aser Arogotem inyaksangshi azüoker.

Mauritania nung kettangsertemi Khristan lenirtem aika puogo

December 14, 2023: Tan ita tetenzüklen Islamic Republic of Mauritania nung kanga nüntugu Khristan lenir ka densema Khristan lenir 14 aser parnok kibong züngsemtem puogo, ta International Christian Concern (ICC)-i metedaktsü.

Muslim nütsüng teimba aliba linük nung ya Khristan nütsüng 1,000 shi dang lir, aser tang apuba Khristan lenirtemji linük nung Khristan lenirtem ajak apuba amai lir.

Tang Mauritania linük temzung, talisa Arrla 306 kubok pei yimsü toktsür tanga yimsü agizükra tasüba temerenshi agütsütsü; ajisüaka aibemensang jagi tanaben pei yimsü dangi meyipra temerenshi tera tajemba agütsütsü.

Mauritania nung baptiba sentong agiba video ka prokshiba sülen Khristan lenirtemji apu. Senotsü tajangzük angutsü nükjidong nung nisung kati baptiba sentong agiba video ji lemsatep aser iba video ji social media nung kanga prokshia liasü.

Iba video prokshiba sülen Muslim nunger aikati Khristantem anema apusotsü ayongzüka liasü. "Khristan yimsü sayutsüngirtemji asenoki tepsettsüla, kechiyong Mauritania nung Khristantem atema tesem mali," ta kari ayongzüka liasü.

Khristan lenirtem deng masü saka parnok kibong züngsemtema tangartemi amokmerener. Iba ama mapang

ka nung Mauritania sorkar kettangsertem kodamasüba jenjang ka nung lir, kechiyong parnoki meimchir temeden aser yimsü temeden naprongla kümzüktsü meranger.

Sorkaribo sensotem kümzüktsü aser Islam yimsü alia amangertem kümzüktsü nükjidong nung Khristan lenirtemji apu, ta metedaktsü.

Linük nung Khristantem tebilemtsü khuret bentettsü nükjidong nung Khristan lenirtem aputsü telemtetba agi, ta sorkari metedaktsü.

Tang ama tensa ka nung Mauritania nung Khristan kibongtem yaritsü atema International Christian Concern (ICC)-i partners den longemer inyaktsü, ta ICC-i metedaktsü.

ANOGO ABEN TSÜNGREM DEN

Tsüngremi mulungba

Efesa 3:8-21

ajak dang tali asenoki asüngdangba mesüra bilemba

Tang, asenok dak inyakba ain amato, shibai asenoki asüngdangba aser bilemba ajak dang kanga tali inyaktsü akoker ... sentsüwangshi putu ajak nung teti liang. Efesa 3:20-21.

Asenok Khristan tamang aser teimla aser temeim nung tali imlaba nung lendong tila ka lir. Shidakba lendongji kanga ilara imlaba mesüra tai imlaba nung lir. Tanü azüngba Lai lagi asen Tsüngremi inyaktsü akokba dang nungi kanga agi tajemba asen sarasadem aser tebilembaji lir ta sayur, kechiaser asenok meimchir dang asünung, asenoki Tsüngrem indang bilemba aser Pa den jembiba meimchir ama dang lir aser telatet ka dang. Asenok koloki Pa ain uluba mesüra asen taküm nung Pa yimli nung aser alima nung Pai mulungba Pa taochi mapa masatangtettter. Missionary William iba ochi o nung ammeter ashi, "Mapa tulu Tsüngrem nungi imlaang".

Tatishitsü agi, Tsüngrem den Khrista ajanga asenok tesendaktep asenoki Pa nungi tera dang alir kechiaser asenoki iba nungi tulu ka meimlar. Ibaji asenoki Pa sentsüwangshi tuluba asoshi mebushir asütsü. Tenla kidang asen tekülem nung aser kibong tekülem nung angutsüba mengui alitsü akok aser Tsüngremi masadangtetba mapa inyaktsü akok ta mebilemteti tila ka dang asüngdangba asütsü akok.

Aji saka Tsüngremi asenok tatakzük metetta aser Pa O aser Kibuba Benjung nung asenoki sarasademdang aser Pa indang bilemdang Tanel Temeshi-i agütsütsü nangzük.

Tatem maka Kibuba, Na nungi aruba shisatsü agi onok sangdakjang; Ne tenüng nung onoki sarasademer. Amen.

Norway nung Yisu Khrista noksa keta aliba senjang (jandi) ka angu



December 14, 2023: Norway nung Yisu Khrista noksa ajenloka aliba senjang (jandi) ka ngutetogo; iba senjangji küm 1,000 dak temalen yangluba lir.

Senjangji Norway kubok Vestre Slidre tenemlen metal detectorist kati ngutet aser ibaji Byzantine yimli mapang yangluba alitsü südi ta bilemer.

Senjang tip külén Yisu Khristai Laishiba ka amer lir, aser tip külén 962 nungi 1025 küm tashi Byzantine yimsüsürtem Basil II aser Constantine VIII noksa lir.

Senjang nungji ozülü ana lir; kaji "Yisu Khrista, yimsüsürtem atema Chuba" aser kaji Greek oshi nung "Rome nunger tajemba agütsütsü.

Chubatem, Basil aser Constantine" ta zülu lir.

Iba senjangji 977 nungi 1025 AD tsüngda menüng südi, ta bilemer, ta Norway nung Innlandet County Municipality-i

sangdong ka ajanga metedaktsü.

Iba senjangji küm 1,000 tejaklen aliba asütsüa akok, saka kanga tejen maküm. Byzantine yimli nung yimtiba, Isatanbul nungi mile 1,600 shi pilar

senjangji komaser Norway atong, ta kettangsertem süngmangteper.

Iba senjang ngutetba tesem nungji sangküm nungi bushisüngdang tenzüktsü sentong renemogo.

AO OSHI ANGAZÜKDAK:
TANÜ ANGAZÜKTSÜBA OJANG


Sentsüwangshi

(n) akhüm tulu, tobur ajungba agi wangshiba (glory)
 * Kibuba sentsüwangshi anü ama asenok dak yaloker.

Senyangdak

(n) sen yangludak (mint)
 * Yimteni dang senyangdak sen menünger.

OLONG PAITEP # 6644

1				2				3		4	
5		6									
							7				
8											
											9
		10					11				
12								13			
14											
											15
16											

TIPLÉN

2. Au nung chiyongtsüasenba
 5. Mangyimba mapang
 7. O tamendakdak
 8. Peidak malangba
 10. Juli
 12. Sen ayudak
 14. Tenük agi ajitet
 15. Tamajung aküm
 16. Apuso

LANGTSÜNGLEN

1. Lenmang
 2. Aor kidong ka tenüng
 3. Tenerong maten
 4. A_ _ _ g
 6. Mopung apodoka
 ola adokdaktsüba
 9. Tonglipang tagitsü
 10. Menungra bilem
 11. Aiür
 13. S_ _ _ k
 14. T_ _ _ r

OLONG PAITEP # 6643 TELANGZÜBA**TIPLÉN :**

1. Yiar, 3. Tesola, 7. Yimra,
 8. Tangar, 9. Peria, 10. Tanur,
 11. Tasen, 13. Lemjem,
 15. Tambu, 16. Khuret,
 17. Sang.

LANGTSÜNGLEN :

1. Yimti, 2. Amen, 4. Shiner,
 5. Alaka, 6. Satan, 9. Putet,
 10. Tembar, 11. Tatok,
 12. Amang, 14. Jala.

NAI-A YA METETTER MA**NORTH EAST INDIA NUNG STATE TEM
KÜMTETBA KÜM**

North East India nung ajak dang mezüngbuba Assam ya linük nüjiso anguba den küleme 1947 küm state ngua liasü. Iba sülen Nagaland 1963 küm state angu aser Meghalaya, Tripura aser Manipur 1972 küm state ngua liasü. Maneni Arunachal Pradesh 1975 küm aser Mizoram 1987 küm state ngua liasü. Tatensa Sikkim 2002 küm Northeast nung züngoksem ajisüaka parnok 1975 küm state ngur liasü.

India nung Tibet nungertem sadem sadema alir; Dalai Lama**Guwahati, Luchii/December**

14 (Agencies): Tibet nunger tamangba yimsü lenir Dalai Lama, shiba tang India nung jenoka lir, pai ashiba agi India nung aliba Tibet nungertem sadem sadema kecha tetsükdaktsü makai jangradema lidar.

"Onok Tibet nungertem refugee aküm. Ozü linük nung taziükba aika lir, saka idaki India nungbo onok sadem sadema alir," ta 14th Dalai Lama-i ashi.

Dalai Lama Brehostibarnü Sikkim nungi Siliguri-i ogo.

Siliguri nung pai Sed-Gyued Monastery nung tesayuba balala

agütsütsü. Iba Monastery ya pai küm 13 sülen tang mezüngbuba semdanger.

Sikkim yimtiba Gangtok nung anogo asem sentong balala nung shilem agiba sülen Dalai Lama ya West Bengal nung Siliguri-i ogo.

Tibet nunger tamangba yimsü lenir Dalai Lama yagi December 12 nü Gangtok kübok Paljor Stadium nung tesayuba balala agüja, liasü.

Northeast aser Sikkim kübok tesem balala nung nisung 30,000 dak tema Dalai Lama-i jembiba angatsü atema Paljor Stadium, Gangtok nung

adenshia liasü.

1959 küm Tibetan uprising mapang People's Republic of China-i Tibet atsüngba sülen Dalai Lama ya India-i jena aru aser pa tang tashi India nungdang lidar aser pa Tibet nunger tamangba yimsü lenir lir.

1959 küm April 29 nü Dalai Lama-i Mussoorie nungi independent Tibetan sorkar amenok aser 1960 küm May ita Dharamshala-i ao, kong pa tang tashi lidar.

Democratic sorkar ka nem lenmang lapoktsütsü atema pa yimden yimsüsüba nungi 2011 küm anena liasü.

Kuki-Zonunger tasümgang tayimtsünung Churachandpur-i benerogo**Imphal, Luchii/December 14**

(Agencies): Imphal kübok mozüki indang mortuary tem nung yua aliba Kuki-Zo nunger tasümgangtem Brehostibar anepdang tayimtsü nung benerogo.

Tasümgangtem bener aotsü atem chopper ana tashi amshia liasü.

Supreme Court-i Manipur sorkar dang state nung mepetmesü adokba mapang taküm samaretem akümketa aremtsü asoshi jenjang tapet agitsü atema tetuyuba agütsüba sülen tasümgangtem ya Churachandpur district headquarters tonga bener otstiogo.

Tasümgang 175 lir aser item

rongnungi 171bo maitsü tetuyuba agütsüogo.

Manipur sorkari, tasümgang ajak nungi DNA sample agizüka ayutsü asoshi tetuyuba agütsüogo, kechiyong asürtém ya aika tang ken o bushisüngdanga alibatem nung densema li.

Manipur kübok Kangpoki district nung amenoker aliba Committee on Tribal Unity (CoTU)-i Kuki-Zo kin nungi maitsü mejangja aliba tasümgangtem meshitsü asoshi tebilemba aliba sangdongogo.

Manipur nung May 3 nü Kuki aser Meitei nunger tsüngda mangatetep tulu adoka nisung 200 shi taküm samaogo aser tang yimjung asoshi inyaktepba mapang ka lir.

Mizoram nung ganja shibelener Myanmar nunger ana apu**Aizawl, Luchii/December**

14 (Agencies): Mizoram nung Champhai district kübok Myanmar den arrtsü

anasa Myanmar nunger ana sen lakh 10.73 alang ganja bener lia puogo.

Assam Rifles source kati ashiba agi, osang tejangja ka angazükba sülen Assam Rifles aser Mizoram Excise and Narcotics department na

longjemer Zote yimtsüng meita aoba mapang nisung ana ya pua liasü.

Myanmar nungi shibelener aruba ganja ya kanga dang sangra süoshi juli aser lisem nung mimbanger liasü.

Aija alisang ana ya Myanma kübok Darkhai tesem nungi Ginsiansiama (25) aser Thanlamchina (35) metedaktsü.

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA.**

Dated, Kohima thethDec'23

ADVERTISEMENT

NO. DHFW-3/117/KPE/Crt2023/

In pursuance of the Government of Nagaland, Department of Health & Family Welfare letter No.HFW(A)COURT-4/123/2019/770 Dated Kohima the 30th Oct 2023, Applications from indigenous inhabitants of the District are hereby invited to fill up1 (one) post of Grade-1V(Medical Attendant) as shown below under the establishment of the Chief Medical Officer,Kiphrie. This is in compliance of the Hon'ble Gauhati High Court, Kohima Bench Judgment Order dated 20.01.2023 passed in No. W.P (C) No. 4 172/2019.

Sl. No.	Name of the Post	Place of Posting	Remarks
1.	Medical Attendant	Longya Sub Centre	1(One) Post

- (1) The applicant should be an indigenous inhabitant of the concerned area. (As per Govt O.M. issued vide No.AR-3/GEN-174/2007 (PT) Dt. Kma, the 4th June 2016)
- (2) The age of the candidate should not be less than 18 years and not more than 35 years as on 31.01.2024, which shall be supported by the Birth Certificate from the Department of Economics & Statistics.
- (3) Candidate should be atleast Class V passed.
- (4) Application should reach the Directorate of Health & Family welfare, Nagaland Kohima on or before 20.01.2024, Room No-301(Establishment section). Interview will be conducted on 07.02.2024 from the Directorate of Health & Family Welfare Nagaland, Kohima (IDSP Hall) starting from 11.00 AM. No separate calling letters will be issued, the selected candidates result will be notified in the local dailies.
- (5) The candidates are hereby directed to bring the following documents in original.
 - (a) N.O.C from the respective Village Council/Ward Chairman.
 - (b) Indigenous Inhabitant Certificate.
 - (c) Schedule Tribe Certificate.
 - (d) Academic Documents.
 - (e) Incomplete applications shall be summarily rejected by the Board.

SD-
 (DR.RITU THURR)
 Principal Director
 Directorate of Health & Family Welfare
 Nagaland: Kohima.

**GOVERNMENT OF NAGALAND
DIRECTORATE OF HEALTH & FAMILY WELFARE**

NAGALAND : KOHIMA.

NO. DHFW-3/117/Grade-IV/PRN/APTT/2018/

ADVERTISEMENT

In pursuance of the Government of Nagaland, Department of Health & Family Welfare letter No.HFW(A)COURT-4/13/2023/753 Dated Kohima the 13th Oct 2023, Applications from indigenous inhabitants of the District are hereby invited to fill up3 (Three) posts of Grade-1V as shown below under the establishment of the Chief Medical Officer,Peren. This is in compliance of the Hon'ble Gauhati High Court, Kohima Bench Judgment Order dated 02.08.2021 passed in No. W.P (C) No. 4 (K) 2019, W.P(C) No.5 (K) 2019 and W.P(C) No.14 (K) 2019. This order supercede the previous order advertised vide No.DHFW-3/117/Grade-IV/PRN/APTT/2018/13498-504 Dated, Kohima 28th March 22.

Sl. No.	Name of the Post	Place of Posting	Remarks
1.	Medical Attendant	Mpai Sub Centre	Two (2) Posts
2.	Multi-Tasking Staff (MTS)	CMO Office Peren	One (1) Post

Dated, Kohima the 15th Dec' 23

- (1) The applicant should be an indigenous inhabitant of the concerned area. (As per Govt O.M. issued vide No.AR-3/GEN-174/2007 (PT) Dt. Kma, the 4th June 2016)
- (2) The age of the candidates should not be less than 18 years and not more than 35 years as on 31.01.2024, which shall be supported by the Birth Certificate from the Department of Economics & Statistics.
- (3) Candidate should be atleast Class V passed.
- (4) Application should reach the Directorate of Health & Family welfare, Nagaland Kohima on or before 20.01.2024, Room No-301(Establishment section).
- Interview will be conducted on 07.02.2024 from the Directorate of Health & Family Welfare Nagaland, Kohima (IDSP Hall) starting from 11.00 AM.
- No separate calling letters will be issued, the selected candidates result will be notified in the local dailies.
- (5) Those applicants who has already applied against the above mentioned posts advertised vide Order No.DHFW-3/117/Grade-IV/PRN/APTT/2018/13498-504 dated, Kohima 28th March 2022 should re-apply.
- (6) The candidates are hereby directed to bring the following documents in original.
 - (a) N.O.C from the respective Village Council/Ward Chairman.
 - (b) Indigenous Inhabitant Certificate.
 - (c) Schedule Tribe Certificate.
 - (d) Academic Documents.
 - (e) Incomplete applications shall be summarily rejected by the Board.

SD-

(DR.RITU THURR)

Principal Director

Directorate of Health & Family Welfare
Nagaland: Kohima.

**GOVERNMENT OF NAGALAND
DIRECTORATE OF SCHOOL EDUCATION**

NAGALAND : KOHIMA

NO. ED/EST-1/GT-ADVT/2022/761

Kohima, the 14th December, 2023

NOTIFICATION

The Provisional Result of the Graduate Teacher (Hindi)recruitment examination conducted in pursuance to this Office Advertisement of even number dated 16/03/2022 read with Corrigendum of even number dated 04/04/2022 and 30/05/2022 is hereby declared in order of merit as given in Annexure I to III.

Annexure I	List of Selected & Waiting List Candidates
Annexure II	Details of Marks Secured in the Written Test
Annexure III	Details of Academic Marks & Marks Secured in the Recruitment Exam

The selected candidates have to submit acceptance of offer of appointment within 15 days from the date of issue of this notification. The Waiting List will remain valid for a period of 1 (one) year from the date of publication of results and candidates placed in the Waiting List will be offered appointment in order of merit if the selected candidates against the particular category fail to accept the offer of appointment within the specified time limits.

This issues in pursuance to the Judgement & Order dated 22nd November, 2023 by the Hon'ble High Court in WP (C) No. 123/2022 and with the approval of the Government vide Letter No. DSE/MISC/12-128/Recruit/2020/4035 dated 12th December, 2023.

The Notification along with Annexure I to III is available at <https://doseni.in>

(THAVASEELAN K) IAS
Principal Director

China o Russian tayimtsü KADIZ-i ait, S Korea jetsadenshi

Seoul, Luchii/December 14 balaka agitsü meshir, ta Beijing-i iba zone ya territorial (Agencies): China aser International Civil Aviation airspace masü aser yangji linük Organization ajanga ashir. Ibai linük indang airspace nungi balaka, koba linük ka litsü tema anüng ajunga lir aser tzükum nungi nautical miles 12 tashi aor.

Brehostibar anüngdang 11:53 ako aser 12:10 ako nung Russia nunger tayimtsü pezü aser China nunger tayimtsü ana Sea of Japan (East Sea ta ajar) anünglen Korea Air Defense Identification Zone (KADIZ) telungi ait aser ao, ta South Korea indang Joint Chiefs of Staff (JCS) sangdong ka ajanga ashi.

Tayimtsü senzüba nung tai apuba osang ka China nem South Korea-i agütsüogo, ta JCS ketdangsür kati ashi. Ajisüaka Russia denbo iba indang mejembi.

ADIZ nungya linük balalai bendanger tayimtsü dang par sasa jangjatetsü asoshi mera Moscow-i Korea indang air defence zone ya magizüker.

China aser Russia ya akhidang nungi North Korea tembar lir, aser South Korea tembar Washington-i taoba ita Pyongyang aser Moscow tsüngta mitkar tsütsü tesendaktep ainer aser lendong lir, ta tekumdangtsü shia liasü.

JCS ajanga ashiba agi, KADIZ telungi maitdang bendanger indang tayimtsü aliba jangjatet aser mera balala agitsü asoshi par air force fighter jets tem adenshidaktsü.

Tayimtsü senzüba nung tai apuba osang ka China nem South Korea-i agütsüogo, ta JCS ketdangsür kati ashi. Ajisüaka Russia denbo iba indang mejembi.

Moscow-i Korea indang air defence zone ya magizüker.

Tsürabur Tepela Tasoba Anogo




Mrs. Tsuktinela Pongen (Longmisa)

Tsüngrem taochi ajanga ozü temeim tsürabur Mrs. Tsuktinela Pongen (Longmisa), la tasoba anogo December 14, 2023 nü Kum 94 junga anir arutsüba asoshi Tsungrem tenüng asanger. Ano maneni teyanglur Tsüngremi ozü tsurabur tanela renema anema aliba arishi talang moajang ta sarasademtsür.

- Temeim Chirnurtem, Semchirtem & Kinungertem.

**LAND FOR SALE AT NAGA UNITED VILLAGE HIGHWAY TOUCH, DRY LAND. NEAR HOPE ACADEMY.
PRICE RS. 1300 PER SQ.FT. NEGOTIABLE.
CONTACT : 8974571416 / 8798119488**

Rara indang nükjidong memelensi: Vladimir Putin



Moscow, Luchii/December

14 (Agencies): Russia Tir Vladimir Putin-i Russia nunger dang asen nükjidong tongtetba sülen ang Ukraine den yimzung alitsü ta ashi.

Ukraine nung 2022 küm February ita nungi tenzüka tashi ajak amshia amak tenzüker osangbener den senden tulu mezüngbuba alidang pai iba o ya shia liasü.

Küm shia iba ama sentong ayongziuka agir aser iba mapang pai Russia nunger den osangbener ajanga jembia arur, saka taoba küm iba sentong ya magi.

Pai iba senden talangba Ukraine nung 'special military operation' indang jembia liasü.

Mezung pai Russian sovereignty indang jembia liasü. "Sovereignty medeni asen linük alitsü makoktsü. Ibai tapi agi alir masü," ta pai sorkar kübok aliba Channel One host Yekaterina Berezovskaya dang ashi.

"Asen nükjidong tongtetba sülen (Ukraine nung) yimzung alitsü. Item nükjidong memelensi lir aser item rongnung denazification, demilitarisation aser neutral status dena lir," ta Putin-i ashi.

Pai Ukraine nung Russia sepi 617,000 oa raratar ta ashi. Taoba küm sepi nung inyaktsü asoshi nisung 300,000 anikoba den külemi contract soldiers ama pei sasa mulunga nisung 486,000 meyongnem agija lir ta ashi.

"Teka nung hadir amer asen linük tejangraba kumzüka ayutsü renema aliba nisuntem tajemba makumer. Küm tatem tashinung nisung million tesadang ka alitsü. Asenoki kechi atema mobilisation

nüngdaker?"

Pai sepaitem akoksaba indang mashi saka par "close circle" nungi tanurtemi private military company tem asoshi raraogo aser pa asoshi anasa aliba nisung aika süogo, ta ashi.

Rara tenzükba sülen Russia nunger sepi 315,000 shi tepset mesüra yirur alitsü südi ta classified US intelligence report ka ajanga tan hopta ashi, aser ibaji rara tenzükang Russia sepi aliba shilem 90 jungsüa lir ta ashir.

Ukraine anüdoklen Russia nunger kübok aliba Luhansk nungi raraba osangbener kati Putin dang Dnipro ayong anasa Russia-i amokbanga aliba tesem nung tawa Ukraine tetsüng ajemokba indang asüngdanga liasü.

Crimea-i aitsü meranga Ukraine-i tatembangba mera ka ama Ukraine mitkar temi tesem tilaka nung takok anguba rasaa ashidang, asen sepaitem kumzüksü mechii Russia sepaitemi metres ishika atsüngä aitsü telemetveta agi ta Tir Putin-i ashi. Kyiv nükjidong ya West dang mitkar teyari tali nüngdaker ta sayunüba lir, ta pai ashi.

"Parnoki kechiba ya inyakerar ni memetet, parnoki par nisuntem tepsetdaktsütsü yoker, ibai Ukraine sepaitem asoshi tasüi aoba den sako lir. Ibai political lir, kechiaser Ukraine lenirtemi bendang linüktem ya teyari meshir."

Anüolen linüktemi rongsenketzung tsütsü tenokdangba/temerenshi agüjaka aser Ukraine amakba mechii yimtenren tsütsü senzüka yujaka Russia tejakleni aotsü, ta Putin-i ashi.

3buba Asür Nungshizenla nüngtem badminton tournament asaya



3rd Late Nungshizenla Memorial Badminton Tournament nung takokertem nem senpet agütsüdang tangokba noksa nung angur. Mokokchung, 14th December, 2023.

Mokokchung, Luchii/ December 14 (TYO): Asaya telemsa ka dang aser Marepkong Shuttlers-i open dang liasü aser ayongzükba 3buba Late tarep 13-i shilem agi. Item Nungshizenla Memorial rongnung Lkr Imsong Badminton Tournament champion aser runner-up ji La December 12 aser 13 ta ana Shuttlers liasü. Takoker nem aonung Thy-coon Cottage, kulikaket den sen agi Marepkong Ward nung asayaa mungogo.

Mokokchung nung aliba 12

Assam Rifles Commandant, Anil Kumar Jha tongti tesemdanger ka ama arua iba sentong meraketsü. Taküm iba asayamung NLA Speaker, Sharingain Longkumer indang P.S Mr & Mrs. Alemjungshir kibongi sponsor sütsüba asoshi Marepkong Shuttlers-i pelaba metedaktsü.

Satwik aser Chiragna Khel Ratna atema nominate süogo

Luchii/December 14, 2023

(Agencies): Badminton asaya nung India nunger nüngtugu tebur tarep asayar Satwik Sairaj Rankireddy aser Chirag Shetty na Major Dhyan Chand Khel Ratna Award atema nominate süogo.

Khel Ratna, Arjuna Award, Dhyan Chand Lifetime Award aser Dronacharya Award atema nominate asüba list nung nüngtugu asayartem aika densema lir, shirnoki kümtem tsüngda international jenjang nung kanga junga asaya arudar.

Dronacharya Award ya coach tem nem agütsür, shirnoki asayartem anitetsü atema bendanga agüja inyaker. Taküm coach tem rongnung nüngtugu chess coach RB Ramesh densema lir shibai R Praggnanandhaa aser pa tenü R Vaishali kanga junga aniteta international jenjang nung takok tajung nguogo. R Vaishali ya Arjuna Award atema nominate süogo.

Track aser field asayrtem rongnung Parul Chaudhary aser M Sreeshankar nata Arjuna Award atema nominate süogo aser Lawn Bowl medallist Pinky aser shooter Aishwary Pratap Singh Tomar nata Arjuna atema shima lir.

ICC ODI World Cup 2023 nung kanga junga asayasang Mohammed Shami-a Arjuna Award atema shimo. Iba WC nung pa ya wicket timba agiba densema lir, shirnoki kümtem tsüngda international jenjang nung kanga junga asaya arudar.

Dhyan Chand Lifetime Award atema nominate asürtém rongnung taoba field hockey asayar Vineet Kumar Sharma, taoba badminton asayar Manjusha Kanwar aser taoba Kabaddi asaya Kavita nunger densema lir.

Award balala atema nominee tem:

Major Dhyan Chand Khel Ratna Award: Satwik Sairaj Rankireddy and Chirag Shetty (Badminton).

Arjuna Award: Mohammed

Shami (Cricket), Ajay Reddy (Blind cricket) Ojas Pravin Deotale, Aditi Gopichand Swami (Archery), Sheetal Devi (Para archery), Parul Chaudhary and M Sreeshankar (Athletics), Mohd Hussamuddin (Boxing), R Vaishali (Chess), Divyakriti Singh and Anush Agarwalla (Equestrian), Diksha Dagar (Golf), Krishan Bahadur Pathak and Sushila Chanu (Hockey), Pinky (Lawn ball), Aishwary Pratap Singh Tomar (Shooting), Antim Panghal (Wrestling), Ayhika Mukherjee (Table tennis).

Dhyan Chand Lifetime Award: Kavita (Kabaddi),

Manjusha Kanwar (Badminton)

Vineet Kumar Sharma (Hockey).

Dronacharya Award: Ganesh Prabhakaran (Mallakhamb), Mahavir Saini (Para athletics), Lalit Kumar (Wrestling), RB Ramesh (Chess), Shivendra Singh (Hockey).



Nagaland sepaktakraw under 14 tetsür aser tebur team 67buba National School Games nung shilem agitsü. Iba asayamung ya Delhi nung December 16 nungi 19 tashi asayatsü. Nagaland team ya department of Youth Resources and Sports Nagaland-i senotsü teyari agüja iba asayamung nung shilem agitsü.

Bengaluru FC coach mapa abentsü atema Zaragoza shimogo

Luchii/December 14, 2023

(Agencies): Bengaluru FC-i Brehostibarnü club head coach mapa abentsü atema Spain nunger Gerard Zaragoza shimba sangdongogo. Pa 2024-25 season tashi inyakstsü atema tenangzüktepba yangluogo.

Hokolbarnü Mumbai City FC goal 4-0 agi makokba sülen club aser England nunger coach Simon Grayson na tangatetep nung pilatsü asoshi telemtetba agia liasü aser tang club-i coach tasen shimba sangdongogo.

Arishi küm 41 tain Zaragoza ya 2018-19 season nung Bengaluru puri ISL akokba mapang Carles Cuadrat indang assistant coach liasü aser pa VISA renemba sülen Bengaluru-i arutsü.

"Bengaluru FC-i Gerard tanaben pelashishia agizüker. Taoba küm pongu tsüngda Gerard-i Asia nung temaba jenjang nung aliba league tem nung head coach ama shilem agiogo. Pai club toktsüaka onok den sendaktepa aruogo aser club-i meyipa arutsü tejangraba aliba lemsatepa liasü. Pa lenisüba nung taoba mapang asayaba ama tanaben asayashi tenzüksü imlar," ta club kibur aser Director, Parth Jindal-i ashi.

Zaragoza, Greek club Panserraikos nunga mapang tatsüka coach mapa inyakogo

aser tesüsa pa Emirati UAE Pro League nung Khor Fakkan Club indang coach mapa inyakogo, kong pai manager of the week naroküm anaben tashi ngua liasü. Argentina nunger Sebastian Vega, shiba Khor Fakkan, Al-Ahli aser Panserraikos nung Zaragoza indang backroom staff ka liasü, pa assistant coach asütsü shimogo.

"Iba football club ya ni atema kanga tongtibang aser ni meyipa arutsü atema telemtetba agitsü kanga temela liasü. Ni koba amala mapang ka nung club-i arur aji ni meteta lir. Tetuyuba shidak dang agütsüra club maneni tejakdangi atutsü ta ni temulung lema bilemer. Ni India-i arua mapa tenzüksü matateter. Ajak dak alia ni fan tem den longjemtsü matateter. Asenok ajak longjemer jenjang yanglushitsü," ta Zaragoza-i tenangzüktepba yangluba sülen ashi.

Zaragoza ya taoba mapang asayar ka liasü aser pai Catalonia U14 aser U16 team achaayangogo aser iba den pai 2010 küm Aspire Academy indang Qatari branch nunga shilem agia liasü. 2011 küm pa RCD Espanyol indang Cadete squad head coach aküm. Maneni 2012 küm pa Erovnuli Liga 2 club Locomotive Tbilisi-ia o aser küm ka lir club ya Liga 1-i ia liasü.

Struff nem ATP Comeback Player Of The Year naroküm agütsü

Luchii/December 14, 2023

(Agencies): Jan-Lennard Struff nem Brehostibarnü 2023 ATP Awards nung Comeback Player of the Year naroküm agütsügo.

Pa yiruba ajanga masayai lir ATP Rankings nung jenjang 167 nung aliba nungi No. 21 tonga atu, koba pa indang career nung rangking tajungtiba liasü.

Struff ya Comeback category asoshi tanga asaya asem den külemi nominate süa liasü. Item asayar asem ya-a yirur aliba nungi meyipa arur tour nung kanga junga asayaba atema iba naroküm asoshi shima liasü. Tangar asem ya Dominik Koepfer, Gael Monfils aser Alexander Zverev liasü.

"2023 atema Comeback Player of the Year award anguba asoshi ni kanga pelar. Ni Sascha, Domi aser Gael nunger den nominate süa liasü, aser parnoka iba naroküm angutsü atema kanga tetemsü liasü, anungji parnok nema tenüngsang agütsür," ta Struff-i ashi. Paisa, pa indang video

osang ajanga par team aser kinungertem dang kanga pelaba lemsatep. "Nenok teyari medeni iba naroküm mongutetla," ta pai ashi.

Struff ya season tenzükba mapang top 150 tema nung liasü, saka ATP Masters 1000 nung kanga junga asayaba sülen tejakdangi atu. Pa Monte-Carlo asayamung nung quarter-finals tonga asaya aser Mutua Madrid Open nung Masters 1000 final ka tonga asayaba mezungbuba lucky loser aküm.

Iba sülen June ita pa Stuttgart nung final tonga asaya, ajisüaka hip yiruba ajanga arishi küm 33 tain asayar ya ita asem tashi masayatettsüa aküm aser pa hopta tenet tashi racquet nunga mekongshi-i liasü.

Iba sülen pa September ita Zhuhai nung asaya aser mezungbuba asaya nung pai Cristian Garin set asem nung koka liasü aser November ita Sofia nung taküm asoshi tour-level semi-final tasembuba tongteta liasü. Pa jenjang 25buba nung küm tembangogo.

BILEMDANGANG

"Takok angutsü asoshi meranga inyakstsüba dak alaker tanga lenmang kecha mali."